



Isang Katesismo upang mapagnilay-nilay ang paniniwala ng –

Philippine United Apostolic Church



Isang Katesismo upang mapagnilay-nilay ang paniniwala ng

—

Philippine United Apostolic Church

(Naitatag sa Pilipinas 1991 – Nairehistro sa ilalim ng
Security and Exchange Commission No. ANO95-03164 noong ika-14 ng
Agosto taong 1995, Republika ng Pilipinas)

**Nakapaloob ang mga Panalangin sa Pagsamba
at mga Panalanging Pampamilya**

Ang layunin ng “Apostolic Church” ay upang dalhin ang lahat sa Biyaya ng ating Panginoong Hesukristo, upang muling papanumbalikin ang tao sa Diyos at upang sila’y akayin sa pananampalatayang tulad sa isang bata sa pamamagitan ng Banal na Espiritu upang maihanda bilang isang kasintahang babae sa Kanyang pagbabalik na nasa kapangyarihan at kaluwalhatian na malapit ng maganap.

Ang katesismong ito ay ibinigay sa Taon ng Biyaya 2000 sa ilalim ng pamamahala ni Apostle Cliff Flor, Queensland upang magamit sa Pilipinas.

ALL RIGHTS RESERVED
(First Edition)

Hindi natin dapat kalimutan na ang tamang paniniwala at tamang pag-uugali ay dapat laging magkasama, at ang tamang pag-uugali ay makikita mula sa tamang paniniwala. Ang Diyos ay malulugod lamang sa ating mga asal sa buhay kung nakikita sa atin ang tiwala sa Kanya at sa Kanyang salita.

“All Honour to God”

Apostle Cliff Flor
Apostolic Church of Qld. – Northern District
P.O. Box 8077
Mt. Pleasant, Q. 4740

Bishop Delfin Cayabyab
Philippine United Apostolic Church
P.O. Box 20, Dagupan City
Pangasinan 2400 Philippines

Bishop Jimmy B. Soriano
Philippine United Apostolic Church
P.O. Box 560, 1400 Caloocan Central Post Office
Caloocan City Philippines

Elder Dagsi Dalunag
Philippine United Apostolic Church
Bucloc, Abra
Philippines

TALATUNTUNAN

	Pahina
Ang Paniniwala at Pananampalataya ng Apostolic Church	3
Ang Sampung Utos na Ibinigay ng Diyos kay Moises	
Sa Bundok ng Sinai	5
Ang Kautusan na Sinalita ni Hesus na Naitala sa Marcos Kabanata 12	6
Mga Relihiyosong Aral	6
Gabay sa mga Panalangin	12
Ang Panalangin na Itinuro ng Panginoon	13
Panalangin ng mga Bata	13
Panalangin ng Isang Bata sa Pagkain	13
Panalangin sa Umaga ng Maliliit na Bata	14
Panalangin sa Gabi ng Maliliit na Bata	14
Panalangin ng Bata pagkatapos ng Banal na Komunyon	14
Panalangin ng Bata sa pagpasok ng Iglesia	14
Panalangin ng Bata sa Kaniyang Makadiyos na mga Magulang.....	15
Kahulugan ng Simbulong 4 R.....	15
Ang Kahulugan ng Pagpapatunay ng Ating Pananampalataya	16
Himno sa Pagpapatunay ng Ating Pananampalataya	16-17
Mga Gabay sa Panalangin ng mga Kaanib ng Iglesia	17
Panalangin sa Umaga	17
Panalangin sa Hapag Bago Kumain	18
Panalangin sa Gabi	19
Iba pang Mga Panalangin	20
Panalangin ng mga Kaanib Tuwing pagpasok sa Banal na Pagsamba	20
Panalangin pagkatapos makibahagi sa Banal na Komunyon.....	20
Panalangin ng Pagsisisi sa Paghingi ng Kapatawaran	20
Panalangin sa Kagalakan ng Pag-aasawa.....	20-21
Panalangin upang Tayo ay Mapabuti	21
Basbas ng Apostol	21

ANG PANINIWALA AT NANAMPALATAYA APOSTOLIC CHURCH

Itong Paniniwala at Pananampalataya ay naitatag sa pamamagitan ng turo ng mga Apostol at sa Salita ng Diyos na ibinigay sa Banal na Kasulatan.

Sa pagpapahayag ng aming paniniwala sa paraang ito, ay nararapat na maunawaan na kami ay naniniwala na mayroon lamang iisang Diyos, ang buhay at totoong Diyos na ang pagka-Diyos ay binubuo ng Ama, ng Anak at ng Espiritu Santo at itong tatlo ay Isang Diyos na Walang Hanggan. Ito ay kilala bilang Ang doktrina ng pagka-trinidad. (Deut. 6:4, I Cor 8:4, Mat 3:16-17, Mat 28:19, I Ped 1:2, I Jn 5:7)

1. – Tayo’y naniniwala sa Diyos Amang Makapangyarihan, na Siyang may likha ng Langit at Lupa.
(Gen 1:1, Gen 1:31, Ex 20:11, Awit 102:25, Jn 1:3, Heb 1:10, 11:3)
2. – Tayo’y naniniwala kay Hesukristo ang bugtong na Anak ng Diyos Ama, ang ating Panginoon at Tagapagligtas, na ipinaglihi sa pamamagitan ng Banal na Espiritu, ipinanganak ni Birheng Maria, nagdusa sa krus namatay at inililing, lumusong hanggang sa Hades, sa ikatlong araw Siya’y nabuhay, nagturo sa Kaniyang mga alagad sa loob ng 40 araw tungkol sa mga misteryo ng kaharian ng Diyos, umakyat sa Langit at bilang ating Haring Saserdote Siya’y naupo sa kanan ng Diyos Amang makapangyarihan, mula doon Siya’y muling darating upang kunin ang Kaniyang mga hinirang at pinili para sa Kaniya at sa huling paghuhukom upang hatulan ang mga buhay at maging ang mga patay.
(Mat 16:16, Mat 3:17, Mat 1:18, Mat 27:35, Mat 27:50, Mat 27:60, Ef 4:9, Marc 16:6, Luc 24:51, Heb 4:14, Mat 24:30, Mat 24:31, Jn 5:21-22)
3. – Tayo’y naniniwala sa Espiritu Santo, ang Pandaigdig na Banal na Apostolikong Iglesiya, ang pakikisama sa mga banal, pagpapatawad at katubusan ng mga kasalanan, at ang muling pagkabuhay tungo sa buhay na walang hanggan (eternal).
(Jn 14:26, I Ped 1:12, Ef 4:4-5, Ef 4:13, Ef 2:20-21, Ef 3:15, II Cor 13:14, Gawa 26:18, Mat 26:28, Luc 14:14, Apoc 20:6)
4. – Tayo’y naniniwala na si Hesukristo ang Siyang ulo ng Kaniyang Iglesiya, na Siyang naghahari at naglaan sa pamamagitan ng Espiritu Santo na kung saan Kaniyang ipinadala at patuloy na nagpapadala ng Kaniyang mga Apostoles.
(Col 1:18, Jn 14:26, Jn 6:23, II Cor 3:6, Mat 28:18-20, Ef 2:20, Joel 2:23)
5. – Tayo’y naniniwala sa mga Apostol bilang guro, kaagapay, tagapamagitan at sugo ng ating Panginoong Hesukristo.
(Mat 28:18-20, Gawa 26:17-18, II Cor 1:24, I Tim 2:1, II Cor 5:20)
6. – Tayo’y naniniwala sa Banal na Kasulatan, nang Luma at Bagong Tipan, kasama ang lahat ng mga pangakong naroon mula ng simula hanggang sa katapusan.
(Isa 34:16, Rom 15:4, Mat 24:35, I Ped 1:25, II Tim 3:16)

7. – Tayo’y naniniwala sa Banal na Bautismo sa tubig, na sa pamamagitan nito tayo’y mapasama kay Kristo Hesus.
(Mat 28:19, Gal. 3:27, Rom 6:3-4, Jn 13:8, Efeso 5:26-27, I Pedro 3:21-22)
8. – Tayo’y naniniwala sa Banal na Katawan at Dugo ni Hesukristo, na sa pamamagitan ng sakramentong ito, na ang Ama at Anak, sa pamamagitan ng Espiritu Santo, ay tumitira sa atin.
(Jn 6:53-58, Gal 2:20)
9. – Tayo’y naniniwala na sa pamamagitan ng Katawan at Dugo ni Kristo Hesus, ang ating kaluluwa ay nabihisan ng Kaniyang katuwiran at nahahanda para maging Kaniyang kasintahang babae, at naging sisidlan para sa Espiritu Santo, sa pamamagitan ng ating Amang sumasalangit ay ginawa ang ating panloob na pagkatao katulad ng sa Kaniyang Anak.
(Mat 26:28, Apoc 7:9, Apoc 8:10, Rom 8:10, Apoc 21:2, I Cor 3:16, I Jn 2:29, Ef 4:13, I Cor 15:21-22)
10. – Tayo’y naniniwala sa pagpapatong ng kamay, na sa pamamagitan nito’y tinanggap natin ang pahid ng Banal na Espiritu, at sa pamamagitan ng pagpapatong ng mga kamay ng mga Apostol ay gisingin at maging aktibo ang mga kaloob ng Espiritu na nasa atin.
(Jn 6:27, Gawa 10:38, Gawa 8:17-18, Ef 1:13, II Cor 1:22)
11. – Tayo’y naniniwala na ang Espiritu Santo ay nagbibigay sa atin ng lahat ng mga turo mula sa langit, ayon sa mga salita at pangako ng ating Panginoong Hesukristo sa pamamagitan ng mga Apostol na ipinadala sa buong mundo para sa layuning ito.
(Jn 14:26, Jn 15:16, Jn 15:26-27, Mat 10:40, Luc 24:47-48, Apoc 21:14)
12. – Tayo’y naniniwala na tayo’y nabubuhay sa mga huling araw ng Diyos (isang libong taon ay isang araw sa Diyos) at ang araw ng pagbabalik ng ating Panginoong Hesukristo ay nalalapit na, na Kaniyang kukunin ang Kaniyang kasintahang babae, mula sa mga nangatulong sa mga patay at ang mga nabubuhay sa unang muling pagkabuhay.
(Ex 20:11, II Ped 3:8, Mat 24:30-31, I Thes 4:13-18, Apoc 20:4-6)
13. – Tayo’y naniniwala sa pakikiisa ng Langit kay Kristo at ganon din sa lupa, at ang panahon ng paglilinis ay magaganap.
(Jud 14:15, Ef 5:26-27, Apoc 19:7-9, Heb 12:26, II Ped 3:10)
14. – Tayo’y naniniwala sa paghahari ng kapayapaan sa loob ng isang libong taon dito sa lupa bilang ikapitong araw sa Panginoon, pagkatapos nito’y susunod ang huling paghuhukom.
(Dan 2:44, Mat 16:28, Mat 25:34, Apoc 20:6, Apoc 20:11-15)
15. – Tayo’y naniniwala sa Diyos Ama bilang manlilikha, sa Anak ng Diyos bilang Haring Saserdote na siyang namamagitan para sa atin at sa Espiritu Santo sa Katawan at Dugo ni Hesukristo, bilang ating Guro, na nangungusap sa atin, sa Banal na Iglesia Apostolika.
(Neh 9:6, Heb 4:14-16, Rom 8:9-14, I Ped 3:18, I Ped 1:15-19)

**ANG SAMPUNG UTOS NA IBINIGAY NG DIYOS
KAY MOISES SA BUNDOK NG SINAI
- (Exodus Kabanata 20)**

1. – Ako ang Panginoon mong Diyos, na naglabas sa iyo sa lupain ng Egipto, sa bahay ng pagkaalipin. Huwag kang magkakaroon ng ibang mga dios sa harap ko.
2. – Huwag kang gagawa para sa iyo ng larawang inanyuan o ng kawangis man ng anomang anyong nasa itaas sa langit, o ng nasa ibaba sa lupa, o ng nasa tubig sa ilalim ng lupa: huwag yuyukuran sila, o paglingkuran man sila; sapagkat akong Panginoon mong Diyos ay Diyos na mapanibuhuin, na aking dinadalaw ang katampalasan ng mga magulang sa mga anak, hanggang sa ikatlo at ikaapat na salin ng lahi ng mga napopoot sa akin. At pinagpapakitaan ko ng kaawaan ang libolibong umiibig sa akin at tumutupad ng aking mga utos.
3. – Huwag mong babanggitin ang pangalan ng Panginoon mong Diyos sa walang kabuluhan; sapagkat hindi aariin ng Panginoong walang sala ang bumanggit ng Kaniyang pangalan sa walang kabuluhan.
4. – Alalahanin mo ang araw ng Sabbath upang ipangilin. Anim na araw na gagawa ka at iyong gagawin ang lahat ng iyong gawain. Ngunit ang ikapitong araw ay Sabbath ng Panginoon mong Diyos: sa araw na iyan ay huwag kang gagawa ng anomang gawa, ikaw, ni ang iyong anak na lalake ni babae, ni ang iyong aliping lalake ni babae, ni ang iyong baka, ni ang iyong tagaibang lupa na nasa loob ng iyong mga pintuang daan. Sapagkat sa anim na araw ay ginawa ng Panginoon ang langit at lupa, ang dagat, at lahat ng nangaroon, at nagpahinga sa ikapitong araw; na ano pa't pinagpala ng Panginoon ang araw ng Sabbath, at pinakabanal.
5. – Igalang mo ang iyong ama at ang iyong ina: upang ang iyong mga araw ay tumagal sa ibabaw ng lupa na ibinigay sa iyo ng Panginoon mong Diyos.
6. – Huwag kang papatay.
7. – Huwag kang mangangalunya.
8. – Huwag kang magnanakaw.
9. – Huwag kang magbibintang sa iyong kapuwa.
10. – Huwag mong iimbutin ang bahay ng iyong kapuwa, huwag mong iimbutin ang asawa ng iyong kapuwa, ni ang kaniyang aliping lalake o babae, ni ang kaniyang baka, ni ang kaniyang asno, ni anomang bagay ng iyong kapuwa.

ANG KAUTUSAN NA SINALITA NI HESUS NA NAITALA SA MARCOS KABANATA 12

Ang pangulong utos sa lahat ay, pakinggan mo, oh Israel; ang Panginoon nating Diyos, ang Panginoon ay iisa, at iibigin mo ang Panginoon mong Diyos ng buong puso mo at ng buong kaluluwa mo at ng buong pag-iisip mo, at ng buong lakas, ang pangalawa ay ito, iibigin mo ang iyong kapuwa na gaya ng iyong sarili, walang ibang utos na hihigit sa mga ito.

MGA RELIHIYOSONG ARAL

1. – Paano na ang Langit at Lupa na ating nakikita at lahat ng mga hayop, ibon, isda at mga gulay ay lumitaw at nabuhay?

Sagot: Ito ay nilikha sa pamamagitan ng Makapangyarihang Diyos mula sa wala, sa pamamagitan ng Kaniyang makapangyarihang salita sa loob ng anim na araw sa Kaniyang panahon at lahat ay naging napakabuti.

(Gen 1, Heb 11:3, Neh 9:6, Job 26:7, Awit 102:25, Gawa 14:15)

2. – Ano ang pinakamahalagang bahagi sa paglikhang ito?

Sagot: Nang likhain ng Diyos ang tao ayon sa Kaniyang wangis at mula sa lalake nilikha Niya ang babae upang Kaniyang maging katulong.

(Gen 1:26-27, Col 3:10)

3. – Ano ang kahulugan ng pagiging nilikha ayon sa larawan ng Diyos?

Sagot: Ang Diyos ay tatlong bahagi ng kalikasan, ang Ama, Anak at Espiritu Santo at ang tao rin ay ginawa na may katawan, kaluluwa at Espiritu sa gayunding kaayusan.

(Gen 2:7, Mat 10:28, I Thes 5:23, Sant 2:26)

4. – Bakit nilikha ng Diyos ang unang tao, si Adan at mula kay Adan ang unang babae si Eba?

Sagot: Nais ng Diyos na mapuno ang lupa sa pamamagitan ng unang tao, mga mamamayan na laging magbigay luwalhati sa Diyos at maging kabahagi ng buhay na walang hanggan kasama Niya sa kaitaasan ng kalangitan.

(Gen 1:28, I Cor 10:31, Awit 73:24-26, Jn 17:22-24)

5. – Lahat ba ng nasa kaharian ng Diyos na Kaniyang nilikha ay masaya sa plano ng Diyos?

Sagot: Hindi, Si Satanas, ang Arkanghel at mga kasama niya ay nag-iisip na sila ang dapat mamuhay kasama ang Diyos sa Kaniyang kaluwalhatian, sa kataastaasang Langit.

(Gen 3:13-15, Apoc 12:9-10, Apoc 20:2)

6. – Ano ang natatanging tipan na ibinigay ng Diyos kay Adan at Eba para sa kanilang kinabukasan?

Sagot: Ipinangako ng Diyos ang buhay na walang hanggan sa kanila sa kondisyong lubos na pagsunod, pinagbawalan sila na kumain sa bunga ng punong kahoy ng pagkakilala ng mabuti at masama, na kamatayan ang magiging parusa.

(Gen 2:16-17, Kaw 11:19, Ezek 18:24)

7. – Si Adan at Eba ba ay nanatili sa kalagayang katulad ng sila’y likhain?

Sagot: Hindi, sa pamamagitan ng panunukso ni Satanas sila’y naging masuwayin at sinubukang mangatwiran sa kasalanang yaon.

(Gen 3:1-13)

8. – Ano ang naging bunga nito?

Sagot: Ang Diyos ay napilitang palabasin sila sa Kaniyang Hardin, ipinakilala ang kamatayan ng katawan at lumikha ng lugar ng hintayan (tinawag na Hades) para sa walang hanggang kaluluwa, para hintayin ang Kaniyang huling paghuhukom.

(Gen 3:24, Gen 3:19, Awit 9:17, Awit 16:10, Apoc 20:12-13)

9. – Ano ang naging epekto sa kinabukasan ng lahat ng henerasyong ipinanganak mula kay Adan at Eba?

Sagot: Dahil sa namana natin ang ating natural na buhay mula kay Adan at Eba kaya naman namana na rin natin ang kaparusahan ng orihinal na kasalanan.

(Rom 5:12, I cor 15:22, Awit 51:5)

10. – Ito ba’y naging katapusan na ng mga plano ng Diyos para sa mga tao?

Sagot: Hindi, Ang Diyos ay hindi nagbabago, sa Kaniyang itinakdang mga plano na ipaabot ang kaparaanan sa sanlibutan upang ang lalake at babae ay muling mapagkasundo sa Kaniya bilang Kaniyang anak na lalake at anak na babae at tanggapin ang pangakong inilaan sa sangkatauhan.

(Exo 3:14, Mal 3:6, Sant 1:17, Gen 3:15)

11. – Paano pinangunahan at nagturo ang Diyos sa sangkatauhan?

Sagot: Sa loob ng 4,000 taon ipinakita ng Diyos ang Kaniyang kapangyarihan sa pamamagitan ng malaking baha, na pinangalat ang mga tao sa Babel, sa pamamagitan ng mga tao at ibinigay sa kanila ang lupang pangako, ipinakilala ang mga kautusan at hain at gabayan sila sa pamamagitan ng mga salita ng mga propeta, ngunit ang tao ay hindi pa rin kayang panghawakan ang pangako ng buhay na walang hanggan dahil sa kasalanan.

(Gen 6:7-8, Gen 11:9, Gen 17:19, Ex 14:29-30, Mat 23:24, Mal 4:4-5)

12. – Ano nga ang ginawa ng Diyos upang muling ibalik ang pangakong buhay na walang hanggan sa sangkatauhan?

Sagot: Ipinakita ng Diyos ang Kaniyang dakilang pag-ibig sa pamamagitan ng pagpapadala sa sanlibutan ng Kaniyang bugtong na Anak, si Hesukristo, upang maging pangalawang taong nilikha ng Diyos upang mapagtagumpayan ang Kaniyang mga kaaway, kasalanan, impiyerno at kamatayan at simulan ang bagong daan.

(1 Jn 5:11, Jn 1:1-14, Heb 2:14, Luc 1:32, Luc 2:1-15, Jn 3:16)

13. – Paano nilikha ang pangalawang taong ito?

Sagot: Siya'y ipinaglihi sa pamamagitan ng Espiritu Santo at ipinanganak ng isang birhen at dahil dito hindi Niya namana ang orihinal na kasalanan dahil Siya'y ipinanganak una Espiritu at pangalawa ay laman.

(Mat 1:23, Lucas 1:26-35)

14. – Paano Niya napagtagumpayan ang kaaway, ang kasalanan?

Sagot: Napagtagumpayan ni Hesukristo ang lahat ng tukso ng kasalanan sa Kaniyang buong buhay dito sa lupa, at dahil sa kawalan ng kasalanan, Kaniyang dinala ang kasalanan ng buong mundo bilang isang ganap na handog.

(Mat 4:1-11, Jn 1:29, Heb 4:15, Heb 9:26, I Jn 1:7)

15. – Paano Niya napagtagumpayan ang kaaway, ang impiyerno?

Sagot: Pagkatapos ng Kaniyang pagkapako ang Kaniyang kaluluwa ay kailangang magtungo sa impiyerno dahil ito ang destinasyon ng lahat ng tao, ngunit dahil sa Kaniyang malaking tagumpay laban sa kasalanan at sa Kaniyang tiwala sa Diyos, siya'y may kapangyarihan na mapagtagumpayan ang pintuan ng hades magpakailanpaman.

(Apoc 1:18, Luc 23:43, Efeso 4:8-10, I Ped 3:19)

16. – Paano Niya napagtagumpayan ang kaaway, ang kamatayan?

Sagot: Nang ikatlong araw pagkatapos ng Kaniyang kamatayan si Hesukristo ay bumangon sa katawan para makita ng marami na Siya'y muling nabuhay upang ipakita sa atin na ang kamatayan ngayon ay maari ng mapagtagumpayan.

(Heb 2:14, Luc 42:5-7, Jn 20:29, I Cor 15:4-8)

17. – Ano ang papel na dapat ganapin ni Hesukristo?

Sagot: Ngayon ay kaniyang isinaayos ang kaparaanan, na sa pamamagitan ng pananampalataya, ang buong sangkatauhan ay maaaring magtamo ng karapatan na muling makabalik sa Paraiso, na makapamahay sa kaharian ng Diyos at makamit ang buhay na walang hanggan sa kaluwalhatian ng Diyos sa kalangitan.

(Ef 2:4-5, I Cor 3:11, I Jn 2:1, I Cor 15:20-21)

18. – Sa anong kaparaanan dito sa lupa ito'y maaring matamo?

Sagot: Itinatag ng ating Panginoon ang Iglesia upang ito'y maging pansansinukuban at Apostoliko, umakyat sa langit upang maging pangulo ng Iglesia, ipinadala ang Espiritu Santo upang gumabay at pangunahan ang Iglesia at maging ating Propeta at Haring saserdote, magpakailanman sa kanan ng Diyos bilang isang hugpong sa pagitan ng tao at Diyos hanggang sa Siya'y muling suguin upang kunin ang sa Kaniyang sarili at maging ating Hari ng mga Hari.

(Jn 20:21, Jn 15:16, Gawa 1:8, Gawa 1:9, Gawa 2:1-4, Ef 5:23, I Tim 2:5, Heb 6:20)

19. – Ano ang papel o gampanin at layunin ng Iglesia?

Sagot: Ang layunin ng Apostolikong Iglesia ay upang dalhin ang lahat sa Biyaya ng ating Panginoong Hesukristo; upang muling papanumbalikin ang tao sa Diyos at upang sila'y akayin sa pananampalatayang tulad sa isang bata sa pamamagitan ng Banal na Espiritu upang maihanda bilang Nobya sa Kaniyang pagbabalik na nasa kapangyarihan at kaluwalhatian na malapit ng maganap.

(Efeso 2:4-5, II Cor 5:20, Jn 16:13-14, Mat 24:31)